

Soraarnerussutisiaqalernissamut aningaasaatit ilaannit pissarsiat akile-raaruserneqartarnerat pillugu Inatsisartut inatsisaata allanngortinneqarneranik Inatsisartut inatsisaat (Inatsisip atuuffiata ilaneqarnera)

§ 1

Soraarnerussutisiaqalernissamut aningaasaatit ilaannit pissarsiat akileraaruserneqartarnerat pillugu Inatsisartut inatsisaanni nr. 44, 23. november 2017-imeersumi makku allannguutigittinneqarput:

1. § 1, imm. 1, ima oqaasertaqarpoq:

”Soraarnerussutisiaqarsinnaatitaasut aningaasarsianit akileraarutit pillugit inatsimmi § 1, imm. 1, nr. 1 aamma 2, aammalu imm. 2 naapertorlugit akileraartussaataasut marloqiusamik akileraartannginnissamik isumaqatigiissummi aalajangersakkat malillugit naalagaaffimmi allami, Danmarkimi Savalimmiuniluunniit angerlarsimaffilittut isigineqanngitsut, inatsit manna malillugu soraarnerussutisiaqalernissamut aaqquissuussinernit soraarnerussutisiaqalernissamut aningaasaateqarfinni Kalaallit Nunaanni angerlarsimaffilinni sillimmasiisarnermillu ingerlatsineq pillugu inatsimmut ilaasuni, imaluunniit inuunermik soraarnerussutisiaqalernissamulluunniit sillimmasiisarnermik ingerlatseqatigiiffinni Kalaallit Nunaanni angerlarsimaffilinni sillimmasiisarnermillu ingerlatsinissamik Aningaasaqarnermik Nakkutilliisoqarfimmit (Finanstilsynimit) akuerineqarsimasuni pilersinneqarsimasunit akileraartussaapput kiisalu soraarnerussutisiaqarnissaq siunertaralugu ileqqaakkanit aningaaserivinni Kalaallit Nunaanni angerlarsimaffeqartuni aalajangersimasumilluunniit ingerlatsiveqartuni, Finanstilsynimillu akuersissummik peqarlutik nunami maani aningaaseriveqarnermik ingerlatsisuni pilersinneqarsimasunit akileraarutininik, Inatsisartut inatsisaat manna malillugu akiliissapput.”

2. § 2-p kingornagut ilanngunneqarpoq:

” **§ 2 a.** Soraarnerussutisiaqarnissaq siunertaralugu ileqqaakkat aningaasatigut iluanaarutaat suulluunniit akileraarusigassanut ilanngunneqassapput.

Imm. 2. Pisassarisanit annaasat naatsorsuineri ilanngunneqassanngillat, pisassarisanit erniatigut isertitat pisassarisanilluunniit iluanaarutit, marloriaammik akileraarnissaq pinngitsoorniarlugu isumaqatigiissutip kingunerisaanik akileraarusigassat naatsorsorneranni ilanngunneqartussaanngippata.

Imm. 3. Aningaasanut tigoriaannanut kontut erniaat, pappiaqqat aningaasanik nalillit pappiaqqanit aningaasanik nalilinnit allanit aningaaseriviup pigisaanit immikkoortinneqartut iluanaarutaat tunngavigalugit tunniunneqartut akileraaruteqaataasussat naatsorsorneranni ilanngaattissat ilanngaatigereerlugit ukiumut iluanaarutit tamarmiusut ilanngunneqassapput. Kontup taamaattup atorunnaarsinneqarnerani uninngasuutinut tunngatillugu iluanaaruteqarpat annaasaqaateqarpalluunniit assigiinnngissut taanna akileraarusigassanut ilanngunneqassaaq.

Imm. 4. Ingerlatseqatigiiffinnit suliffeqarfissuarmut atasuusunit pisassarisatigut annaasat ilanngaatigineqarsinnaanngillat. Annaasat ilanngaatigineqarsinnaanngitsut, piffissami pisassarisat pissarsiarineqarfiani nalingat tunngavigalugu naatsorsorneqassapput, nalingisa allanngorarnerat apeqqutaatinnagu, taamaattorli tak. imm. 6-8.

Imm. 5. Ingerlatseqatigiiffiit suliffeqarfissuarmut atasuusut tassaapput

1) ingerlatseqatigiiffiit peqatigiiffiillu il.il., aktiaatillit allanngoratik piffissami pisassarisap pissarsiarineqarfiani kingusinnerusumiluunniit ingerlatseqatigiiffinni tamani aktiatigut aningaasaatit 50 procentiinit amerlanerusunik toqqaannartumik toqqaannanngitsumilluunniit piginnittuuffigisaat,

2) ingerlatseqatigiiffiit peqatigiiffiillu il.il., aktiaatillit allanngoratik piffissami pisassarisap pissarsiarineqarfiani kingusinnerusumiluunniit ingerlatseqatigiiffinni tamani taasisinnaanerit 50 procentiinit amerlanerusunik toqqaannartumik toqqaannanngitsumilluunniit pisinnaatitaaffigisaat,

3) aningaasaateqarfik ingerlatseqatigiiffiillu, aningaasaateqarfiup piffissami pisassarisap pissarsiarineqarfiani kingusinnerusumiluunniit ingerlatseqatigiiffinni tamani aktiatigut aningaasaatit 50 procentiinit amerlanerusunik toqqaannartumik toqqaannanngitsumilluunniit piginnittuuffigisai, imaluunniit

4) aningaasaateqarfik ingerlatseqatigiiffiillu, aningaasaateqarfiup piffissami pisassarisap pissarsiarineqarfiani kingusinnerusumiluunniit ingerlatseqatigiiffinni tamani taasisinnaanerit 50 procentiinit amerlanerusunik toqqaannartumik toqqaannanngitsumilluunniit pisinnaatitaaffigisai.

Aktiaatillit aningasarsianit akileraarutit pillugit Inatsisartut inatsisaanni § 86, imm. 3-mi taaneqartut aktiaatillit kikkuunerinik naliliinermit tassaatinneqassapput aktiaatillit taakkoqqissaat. Taasisinnaanerit ilaannik qassinik peqarnermik naatsorsuinermit ilanngunneqassanngillat taasisinnaanerit, aktianik pisisinnaanermik qularnaarinnermut atatillugu taamaallaat tunniunneqarsimasut.

Imm. 6. Imm. 4 atuutissanngilaq pisassarisat nioqqutissanik pigisanillu allanik tunisaqarnikkut kiisalu sullissinikkut akiliutitut akileraaruteqaataasussatut pisassarilerneqarsimappata, akiligassaqarfiusorlu akiligassaqartorlu ataatsimut akileraartussaasimannngippata, imaluunniit pisassarisat ataatsimut akileraartussaanerup kipinerata kingorna pilersinneqarsimappata. Tamannali aatsaat atuutissaaq akiitsutigut iluanaarutit akiligassaqartumut akileraaruteqaataasussaanerit imaluunniit amigartoorutininik annaasaqaatinillu ilanngaatigineqarsinnaasunik suli ilanngaatigineqarsimannngitsunik ikilisitsisarneq pillugu maleruagassani pineqartunut ilaanerit uppersaataatissaqartinneqarpat. Akiligassaqarfiup ilanngaatiginnissinnaanera akiligassallip akileraaruteqarnissaanut aammalu amigartoorutininik annaasaqaatinillu ilanngaatigineqarsinnaasunik suli ilanngaatigineqarsimannngitsunik ikilisitsinissaanut aalajangiisuuppat iluanaarutit aalajangersagaq taanna malillugu akileraaruteqaataasussatut aammalu amigartoorutininik annaasaqaatinillu ilanngaatigineqarsinnaasunik suli ilanngaatigineqarsimannngitsunik ikilisitsisarneq pillugu maleruagassani pineqartunut ilaasutut isigineqassapput. Imm. 1 aammattaaq atuutissanngilaq obligationitigut pisassarisatigulluunniit allatigut, aaqquissuussaasumik niu-erfimmi nioqqutigineqarsinnaasutut akuerisaasutigut annaasaqaatinut.

Imm. 7. Imm. 4 aamma erniatigut pisassarisanut atuutissanngilaq, erniat pineqartut akiligassaqarfiup aningaasarsiaasa akileraaruteqaataasussat naatsorsorneranni ilanngunneqarsimappata, akiligassaqarfiusorlu

akiligassaqartorlu ataatsimut akileraartussaasimanngippata imaluunniit pisassarisat ataatsimut akileraartussaanerup kipinerata kingorna pilersinneqarsimappata.

Imm. 8. Imm. 4 aamma akileraartussaataitaasunut pisassarisanik pisisarlutillu nioqquteqarnermik inuussutissarsiuteqartunut imaluunniit aningaasalersuinikkut inuussutissarsiummik ingerlataqartunut atuutissanngilaq, ingerlatseqatigiiffissuarmut attuumassuteqarneq akiligassaqarfiup siusinnerusukkut taarsigassarsiarititat akilersorneqarnissaat pillugu akiligassallip suliffeqarfiutaanik ingerlatsigallarneranik imaluunniit inuussutissarsiutigalugu suliffeqarfinnik aqqissuusseqqinnermi peqataaneramik taamaallaat peqquteqarsimappat.”

3. § 10, imm. 1, ima oqaasertalerneqassaaq:

”§ 1, imm. 2-mi akileraartussaataitaasut taaneqartut, pissarsianik akileraarutaasussaasunik inatsisitigut pisussaataitaasumit pissarsianit iluanaarutit katinnerattut naatsorsorsinnaagaat aamma pissarsianit iluanaarutit annaasaqaatillu imm. 2 naapertorlugu naatsorsorneqartut, taamaattorli tak. Imm. 3 aamma 4, inatsisitigut pisussaataitaasoq Kalaallit Nunaanni akileraarnermut inatsisit naapertorlugit namminersorluni akileraartarnermi iliuuseqartuunngippat. Piumasaqaataavoq, akileraartussaataitaasoq ukiumi isertitaqarfiusumi qaqugukkulluunniit inatsisitigut pisussaataitaasumut suliffissuakkut attuumassuteqassanngitsoq, tak. aningaasanik ingerlataqarneq pillugu inatsisip Kalaallit Nunaannut atuutsinneqarnera pillugu peqqussummi § 5. Oqaaseqatigiit siulliit aamma aappaat assinganik atuupput, aningaasaliineq aningaasaliisarfik kontonik ingerlatsiviusoq atorlugu pippat.”

4. § 11-mi imm. 7-itut 8-tullu ilanngunneqarput:

” *Imm. 7.* Aktianit piginneqataassutinilluunniit aqqissuussaasumik niuerfimmit assigiinngitsorpassuarnilluunniit niuerfimmit nalunaarsugaajunnaartunit iluanaarutininik annaasaqaatinillu naatsorsuinnermi aktiat anpartilluunniit uninngasuutigineqartut imm. 3 malillugu akileraaruserneqartussat nalunaarsugaajunnaarnertik sioqqullugu nalingat nalunaarsorneqartoq kingulleq malillugu tunineqartutut isigineqassapput. Akileraartussaasup naliliussat oqaaseqatigiit siulliit malillugit naatsorsorneqartut pillugit paasissutissat Inatsisartut inatsisaat manna naapertorlugu akileraarusiinissami atorneqartussat ukiut tamaasa ukiumi aningaasarsiorfiusumi kingusinnerpaamik 1. december aningaaserivimmut nalunaarutigisassavai. Akileraartussaasoq oqaaseqatigiit siulliit malillugit naliliussanik aningaaserivimmut piffissaagallartillugu nalunaaruteqanngippat, aningaaseriviup uninngasuutigineqartut imm. 3, taamaattorli takuuk imm. 8, malillugu naatsorsorneqarneranni pisiarineranni aktiat tunngavigissavaa.

Imm. 8. Imm. 7 aktianut piginneqataassutinilluunniit aqqissuussaasumik niuerfimmi assigiinngitsorpassuarnilluunniit niuerfimmi nalunaarsugaasimasunut atuutinngilaq, ingerlatseqatigiiffiup akiliisinnaajunnaarnera eqqartuussivimmit nalunaarutigineqarsimappat. Aammattaaq imm. 7 aktianut anpartinilluunniit aqqissuussaasumik niuerfimmi assigiinngitsorpassuarnilluunniit niuerfimmi nalunaarsugaasimagaluarlutik nioqqutaajunnaarsikkallarneqarsimasunut atuutinngilaq. Iluanaarutininik annaasaqaatinillu imm. 3 malillugu naatsorsuinnermi aktiat piginneqataassutinilluunniit nioqqutaajunnaarsikkallarneqarnissartik sioqqullugu nalingat nalunaarsorneqarsimasut oqaaseqatigiit aappaat malillugu nalilerneqassapput.”

5. § 16-ip kingornagut ilanngunneqarpoq:

” § 16 a. Aningaaseriviit akileraarusigassat amerlassusiisa taakkualu ilaasa akileraaruteqaataasussat kiisalu soraarnerussutisiaqarnissamut aaqqissuussinerit ataasiakkaat akileraaruteqaataasussat § 1, imm. 1-imi pineqartut akileraarutitaasa naatsorsorneqarnerat ukiumi ukiup aningaasarsiorfiusup tulliani kingusinnerpaamik 22. januar akileraaruseriffimmut nalunaarutigissavaat. Ukiumi aningaasarsiorfiusumi akileraarutissaviit naatsorsorneqartut ukiumi, ukiup aningaasarsiorfiusup tulliani 8. januarimiit ukiumi, ukiup aningaasarsiorfiusup tulliani 15. januarip tungaanut erniaat naatsorsorneqassapput. Akileraarutit ernianik naatsorsorneqartunik ilallugit naatsorsukkap nassiunneqarnerata ilutigisaanik akilernerqassapput. Aningaaseriviup erniat soraarnerussutisiaanik ileqqaartut sinnerlugit akilissavai, kingornalu aalajangersakkat aningaaserivinni ataasiakkaani aalajangersarneqartut aal-laavigalugit soraarnerussutisiaqarnissamut ileqqaagaqartunut ataasiakkaanut tunngatillugu immikkut ernialersuisinnaallutillu ernianik akiliisitsisinnaallutik. Ukiumi ukiup aningaasarsiorfiusup tulliani erniat ernianut § 22, imm. 5-imi taaneqartunut naapertuutissapput.

Imm. 2. Aningaaseriviup akileraarutit kontomit akileraarutit tunngassuteqarfigisaannit, ulloq pif-fissaagallartillugu akilernerqarfissaat sapaatit akunneranik ataatsimik sioqqullugu tigussavai. Aningaasanut kontomi pappiaqqanik nalilinnik uninngasuutitut attuumassuteqartumi matussutissaqanngikkaluarpalluunniit aningaaseriviup aningaasat tigussavai. Kontomik piginnittup konto imassarisaanik imaqqanngippat, taava aningaasat amigaataasut ernialersorneqassapput aningaaseriviup uninngasuutit ernialersorneqartarnerat malillugu, imaluunniit aningaaseriviup kontomik piginnittoq allakkatigut nalunaarfianiit konto aningaasanik amigaateqarneranik, atukkiinermut ernialersuisarneq malillugu, imm. 6 aalaavigalugu. Aningaasartuutigineqartoq isertitanit akileraarutaasussanit pensionisiaqarsinnaatitaasumit naatsorsuusiariqartunit ilanngaatigineqarsinnaanngilaq. Aningaaseriviup akileraarutit akilernerqarnerisa kingorna kingusinnerpaamik sapaatit akunneri 8-t qaangiunneranni akileraartussaasumut ilisimatitsissutigissavai. Konto sipporneqarsimappat kontup aningaasanik qanoq amerlatigisunik sipporneqarsimanera aningaaserivimmit soraarnerussutisiaqarsinnaatitaasumut ilisimatitsissutigineqassaaq.”

6. § 17-imi *imm. 4*-tut ilanngunneqarpoq:

” *Imm. 4.* Aningaaseriviit imm. 1 malillugu akileraarutit akiligassanngortut sinneri imm. 3 malillugu erniaat ilanngullugit, ukiumi ukiup aningaasarsiorfiusup tulliani kingusinnerpaamik 22. januar akileraaruseriffimmut nalunaarutigalugillu akilissavaat. Ilutigitillugu nassiunneqassaaq akileraarusigassat amerlassusiisa taakkualu ilaasa akileraaruteqaataasussat kiisalu soraarnerussutisiaqarnissamut aaqqissuussinerit akileraaruteqaataasussat § 1, imm. 1-imi pineqartut akileraarutitaasa naatsorsorneqarnerat. Akileraarutit sippuutaasa aningaasartaat ernianik imm. 3 malillugu naatsorsukkanik ilallugit aningaaserivimmut tunniunneqassapput.”

7. § 18-imi *imm. 3*-tut ilanngunneqarpoq:

” *Imm. 3.* Akileraartussaaitap naliliussat § 11, imm. 7 malillugu naatsorsorneqartut pillugit paasissutissat aningaaseriviup naatsorsuinissaani imm. 1-imi taaneqartumi atorneqartussat aningaaserivimmut tunniutissavai.”

8. § 22, *imm. 5*-imi oqaaseqatigiit aappaattut nutaatut ilanngunneqarput:

”Akileraarutit aningaasartaat aningaaserivimmit, §§-it 16-imit 18-imut malillugit akilernerqarsimasut allanngortinneqarpata aningaasat nikingassutaasut ukiumi, ukiup aningaasarsiorfiusup tulliani ulloq 8. januarimit akiliisoqarnissaata tungaanut ernialersorneqassapput.”

Oqaaseqatigiit aappaanniit arfineq-aappaannut matuma kingorna tassaalerput oqaaseqatigiit pingajuannii arfineq-pingajuannut.

9. § 22, *imm.* 5-imi oqaaseqatigiit arfernat ima oqaasertaqarpoq:

”Nalinginnaasumik agguaqatigiissitsineq, tak. oqaaseqatigiit pingajuat, uniffiup kingorna ataatsimik kisitsisilerlugu naatsorsorneqassaaq.”

10. § 24-p kingornagut ilanngunneqarpoq:

” § 24 a. Akileraartussaasup § 11, *imm.* 7 malillugu naliliussat aningaaserivimmut piffissaagallartillugu nalunaarutiginnippagit, aningaaseriviup §§-it 16 a aamma 18 malillugit naatsorsukkamik tunniussinermut atatillugu akileraaruserivimmut ilisimatitsissutigissavaa, naliliussap pineqartut pillugit paasissutissat tiguneqarsimanngitsut. Tamanna pereerpat akileraaruseriffiup akileraartussaasoq nalunaarfigissavaa pineqartoq § 11, *imm.* 7 malillugu naliliussat pillugit paasissutissanik aningaaserivimmut nassiussisimanngitsoq, aningaaserivillu tamatuminnga ilisimatissallugu. Akileraartussaasup § 11, *imm.* 7 malillugu naliliussat pillugit paasissutissat nalunaarfigineqarnermi kingorna kingusinnerpaamik qaammatip ataatsip qaangiunnerani aningaaserivimmut nalunaarutigissavai.”

§ 2

Inatsisartut inatsisaat 1. juli 2018-imi atuutilerpoq.

Imm. 2. Inatsisartut inatsisaat ukiumit aningaasarsiorfiusumit 2018-imit atuutilerpoq.

Namminersorlutik Oqartussat, ulloq 28. november 2018

Kim Kielsen

Namminersorlutik Oqartussat

Imaneq 4

3900 Nuuk

E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviat
Naalakkersuisut